

Tin algun mayor hoben ainda, segun Fundacion pa Nos Muchanan

Edad di mamanan hoben a cuminza subi bek



ORANJESTAD (AAN): Directora di Fundacion Pa Nos Muchanan Natascha Gilkes, a elabora ariba e problematica di mamanan hoben den nos comunidad, y el a remarca cu e edadnan ta subiendo bek.

MAYORNAN HOBEN

Segun Gilkes, tin mayornan di diferente edad, y den transcurso di añanan e edad ta subiendo bek. Si tin algun mayor hoben ainda. Mester bisa cu algun di nan ta haciendo un bon trabao. Nan ta hayando guia y sosten di nan mayornan.

Hasta mayornan di mas edad, tin biaha mester di e sosten ey. E sociale netwerk ta importante pa e mucha ora ta lantando un mucha. Esaki

por tin efecto ariba con nan ta lanta nan yiu. Vooral un mama of tata hoben, na momento cu haya yiu, e bida ta cambia pa semper. Esey ta hopi biaha na loke e hobenan no ta para ariba.

Un baby ta tutu, pero na momento cu mester lanta anochi pa dun'e di come, cambia pampers y no por sali mas manera antes. Tur esakinan ta cambionan cu ta tuma luga den nan bida, y hobennan hopi biaha no ta para keto na esey.

Na momento cue mucha t'ey, e ora nan ta bin realisa cu nan no por haci loke nan ta haci antes mas. Salimento cu amistadnan manera antes no t'ey mas y e ora ta e welonan ta esunnan cu ta keda wak pa e mucha.

Asina ta enfatisa ariba e responsabilidad grandi cu tin, na momento cu kies pa bira mayor.

CHARLANAN

Tur aña Fundacion Pa Nos Muchanan ta duna diferente charla basa ariba diferente tema. Scol por acerca nan, ora cu p.e. tin termento tumando na scol, y e scol kier pa docentenan of mayornan por haya mas informacion tocante esaki, y por tuma contacto cu e fundacion, y e ora e fundacion lo bay duna e charla na e mayornan y e docentenan.

Ta prefera pa duna esaki na simultaneamente pa asina tur hende ta para ariba e mesun liña. Mayornan ta finalmente responsabel pa e muchanan ora di lanta nan, pero tambe e docentenan cu tin un rol sumamente im-

portante. Dus como co-educador. E tin hopi influencia ariba e mucha ora cu esaki ta na scol.

Tur aña ta bay e scolnan pa duna charla. E fundacion ta organisa curso y charlanan na mayornan, pero tambe na esunnan cu ta traha cu mucha sea den un crèche, un traimerdia.

Fundacion Pa Nos Muchanan ta kere den e lema "It takes a village to raise a child" (E ta tuma un comunidad pa lanta un mucha). No ta responsabilidad di e mayor so, e ta keda e prome responsabel, pero ta keda responsabilidad di nos tur.

Por ultimo, Gilkes a splica cu no mester warda, dependiendo di ki situacion ta papia di dje, pero no tur ora mester sinta warda ariba un ley pa asina por haci algo bon. P.e. tin e ley di cen-

tro di cuido di mucha, cu a wordo pasa. Pero e no a wordo implementa ainda.

Esey no kiermen cu no por sigui un curso, un charla, upgrade bo mes pa duna lo miho di bo na e muchanan cu bo ta cuida. Semper ta keda responsabilidad di e adulto pa engrandece su conocimiento.

Fundacion ta dunando e cursonan pa mayornan of dunadonan di cuido. Siman pasa a tuma luga curso tocante musica, ya cu esaki tambe ta importante den desaroyo di mucha.

Mayoria biaha ta concentra ariba materia, manera rekenenen. Ta importante ora di traha den crèche, pa tene cuenta cu esaki. E no ta solamente bon pa nan desaroyo fisico, pero tambe social, a bisa.